

आकाशवाणी

खास-खास खबरां:-

- प्रधानमंत्री नरेन्द्र मोदी होरें बक्ख-बक्ख मंत्रालयें ते विभागें दी समीक्षा ते पच्छम एशिया दे हालात बारे विचार लेई सुरक्षा सरबन्धि कैबिनेट कमेटी दी कल बैठक लोआई।
- प्रधानमंत्री नरेन्द्र मोदी होर अज्ज सिविल सेवकें दी छमता विकास गी बढ़ावा देने लेई “साधना सप्ताह-2026” दी शुरुआत करगंन।
- पच्छम बंगाल विधान सभा चुनां दे दुए गेड़ दी अधिसूचना अज्ज जारी कीती जाहग।
- संसद दा बजट आहला इजलास अज्ज सम्पन्न होआ रदा ऐ।
- अमरीकी राष्ट्रपति डोनाल्ड ट्रम्प होरें आखेआ ऐ कि ईरान च अमरीका दे प्रमुख रणनीतिक लक्ष पूरे होई चुके दे न ते अमरीकी सेना तौले अपना कम्म पूरा करी लैग।
- नासा दे ऐतिहासिक आर्टेमिस- दो मिशन दा अज्ज फ्लोरिडा दे कैनेडी स्पेस सेंटर थमां कामयाब प्रक्षेपण कीता गेआ।
- SAFF Under-20 फुटबाल चैम्पियनशिप च मजूदा चैम्पियन भारत नै भूटान गी रहाड़यै फाईनल च अपनी थाहर पक्की करी लैती ऐ।

<><><><><><>

Prime Minister –CCS Meeting

प्रधानमंत्री नरेन्द्र मोदी होरें कल बक्ख-बक्ख मंत्रालयें ते विभागें दे कार्यक्रमें दी समीक्षा करने ते पच्छम एशिया च चला'रदे संघर्ष पर बिचार-विमर्श करने लेई सुरक्षा सरबन्धी कैबिनेट समीति -CCS दी विशेष बैठक दी अध्यक्षता कीती। इनें मुद्दें पर CCS दी एह दुई विशेष बैठक ही। बैठक दे दरान प्रधानमंत्री होरें आम आदमी आस्तै जरूरी चीजें दी उपलब्धता दा आकलन कीता। प्रधानमंत्री होरें मुख्यै च हल दी उपलब्धता ते खरीफ ते रबी दी फसलें दरान इंदी उपलब्धता गी सुनिश्चित करने आस्तै पुट्टे जा'रदे ठोस कदमें उप्पर चर्चा कीती। उ'नें एह बी निर्देश दिते जे चला'रदे संघर्ष दे प्रभाव कन्नै लोके गी बचाने लेई हर संभव कोशश कीती जा।

बैठक दे दरान राई-बाई-हैल- जहाजरानी-विमानन- रसद ते लौहके ते मध्यम उद्यम- MSME च आरदी चनौतिये कन्ने निबडने लेई कीते जाने आहले कम्म पर बी चर्चा कीती गई।

<><><><><><>

PM -Sadhna Saptah

प्रधानमंत्री नरेन्द्र मोदी होर अज्ज सिविल सेवके दी छमता विकास गी बढ़ावा देने लेई “साधना सप्ताह -2026” दी शुरुआत करगंन। कर्मचारी ते सिखलाई मैहकमा- छमता निर्माण आयोग ते कर्मयोगी भारत सांझे तौरा पर अज्ज नमी दिल्ली च इक हफते दे इस कार्यक्रम दा सरिस्ता करने जांरदे न। एहदा मकसद समूलचे मुखै च सिविल सेवके दी छमता- प्रदर्शन ते दक्षता च सुधार आहन्नना ऐ। केन्द्री मंत्रालये- मैहकमे- संगठने ते राज्ये दे सभने स्तरे दे कर्मचारिये ते अधिकारिये दा IGOT प्लेटफार्म ते होरने माध्यमे रां एहदे च हिस्सा लेने दा कार्यक्रम ऐ। छमता निर्माण आयोग दी अध्यक्ष एस. राधा चौहान होरे आखेआ ऐ कि इस दौरान दिखना होग कि छमता निर्माण किस चाली विकसित भारत दे उद्देश्ये गी मूर्त रुप देने च तालमेल बनांदा ऐ। आयोग दे सचिव जगदीप गुप्ता होरे आखेआ कि एह कार्यक्रम मिशन कर्मयोगी दे व्यापक दृष्टिकोण दे मुजब ऐ जेहदा उद्देश्य भविष्य लेई तयार सिविल सेवा दा निर्माण करना ऐ।

<><><><><><>

WB -Notification

पच्छिम बंगाल विधानसभा चुना दे दुए गेड़ दी अधिसूचना अज्ज जारी कीती जाहग। इस गेड़ च 142 विधानसभा हलके च 29 अप्रैल गी वोट पोआए जाहगंन। एहदे कन्ने गै इस गेड़ लेई नामांकन दाखल करने दी प्रक्रिया बी शुरु होई जाहग। मेदवार 9 अप्रैल धोड़ी अपने पर्चे दाखल कराई सकदे न। ओहदे अगले ध्याड़े यानी 10 अप्रैल गी दाखल नामांकन पत्रे दी जांच होग ते मेदवार जेकर चाहन तां 13 अप्रैल धोड़ी। तौंआई चुनां दे पैहले गेड़ लेई नामांकन दाखल करने दी प्रक्रिया बरोबर जारी ऐ। एहदे लेई नामांकन दाखल करने दी खीरी तरीक 6 अप्रैल रखी गेदी ।

पैहले गेड़ लेई चुनां प्रचार जोरे-शोरे जारी ऐ। अज्ज केन्द्री गृह मंत्री ते BJP दे सीनियर लीडर अमित शाह होर जंदी रातीं कोलकाता पुज्जे जित्थे ओ पार्टी दे चुनावी कार्यक्रमें च हिस्सा लैगंन। अज्ज बड्डलै ओ भबानीपुर निर्वाचन क्षेत्र थमां नामांकन दाखल करने दे मौके विपक्ष दे नेता सुवेद्र अधिकारी हुंदे कन्नै मजूद होगंन। अमित शाह होर अज्ज गै हाजरा मोड़ थमां सर्वे बिल्डिंग तगर रोड शो च बी शामिल होगंन- जेहदे च बड़ी बद्ध गिनतरी च लोकें दे हिस्सा लैने दी मेद ऐ।

<><><><><><>

West Bengal –Exit Poll

पच्छम बंगाल दे मुख् चुनांs अधिकारी होरें इक अधिसूचना जारी करियै राज्य च Exit Poll दे संचालन- प्रकाशन जां प्रसार पर पूरी चाल्ली रोक लाई दिती ऐ। चुनांs आयोग नै पिच्छले महीने दी 16 तरीक गी चुनांs दी तरीकें दी घोशणा दे समें गै इस सरबंधै च निर्देश जारी कीते हे। एह प्रतिबंध लोक प्रतिनिधित्व अधिनियम 1951 दे तैहत हर तरह दी Media-Print- Electronic जां प्रसार दे कुसै बी होर रुपै पर लागू रोहग। प्रतिबंध 9 अप्रैल गी बड्डलै 7 बजे कोला 29 अप्रैल संजा साड्डे 6 बजे तक प्रभावी रोहग।

<><><><><><>

Hanuman -Janmotsav

मुख्ये दे बक्ख-बक्ख हिस्सें च अज्ज “श्री हनुमान जन्मोत्सव” मती शरदा ते उत्साह कन्नै मनाया जा'रदा ऐ। राजधानी दिल्ली च बड्डलै सवेला थमां गै हनुमान मंदरें च शरदालुएं दी भीड़ लग्गी दी ऐ ते लोक पवन पुत्र हनुमान जी दे दर्शनें लेई मंदरें च आवा करदे न। दिल्ली दे कनाट प्लेस च प्राचीन हनुमान मंदर च बड़ी बद्ध गिनतरी च शरदालु पुज्जै करदे न। मंदरें च हनुमान चालीसा- सुंदर कांड ते अखंड रामायण पाठ कीता जा'रदा ऐ। मंदरें गी बडे शैल ते सनाहकड़े ढंगै नै सजाया गेदा ऐ। केई थाहरें शरदालुएं लंगर भंडारें दी बी बवस्था कीती दी ऐ। उत्तर प्रदेश च सब्बनें हनुमान मंदरें च शरदालुएं दा रश दिक्खने गी लब्बै करदा ऐ।

अयोध्या दे हनुमान Garhi मंदर च बी लोकें दिये लम्मियां रींगा लग्गी दियां न। हनुमान Garhi दे इलावा प्रयागराज च लेटे हनुमान मंदर सनें प्रमुख मंदरें च विशेष सजावट- अभिषेक ते महा-आरती कीती गई। केई थाहरें अज्ज विशेष शोभा यात्रा बी कड्डियां जा'रदियां न।

<><><><><><>

Trump- Address

अमरीका दे राष्ट्रपति डोनाल्ड ट्रम्प होरें आखेआ ऐ कि ईरान च अमरीका दे प्रमुख रणनीतिक लक्ष पूरे होई चुके देन ते अमरीकी सेना तौले गै अपना कम्म पूरा करी लैग। व्हाइट हाउस थमां प्रसारत अपने 20एं मिंटे दे सम्बोधनै च ट्रम्प होरें अमरीकी मिशन- “आप्रेसन एपिक फ्यूरी” दी कामयाबी दा जिक्र करदे होई आखेआ कि अमरीका पैहले गै केई गुणा मती जित हासल करै करदा ऐ। उ'नें आखेआ कि हर अमरीकी नागरिक हून ओ दिन दिक्खा रदा ऐ जदू ए ईरान दे हमले ते ओहदे परमाणु धमकी दे खतरे कोला मुक्त होई जाहग। राष्ट्रपति ट्रम्प होरें वायदा कीता जे जिसलै एह लड़ाई मुक्कोग तां अमरीका पैहले कोला बड़ा मता सुरक्षत- निग्गर समृद्ध ते महान होग।

<><><><><><>

NASA

नासा दे ऐतिहासिक आर्टेमिस-दो मिशन दा अज्ज फ्लोरिडा दे कैनेडी स्पेस सेंटर थमां कामयाब प्रक्षेपण कीता गेआ। 50 बरे कोला मते बरें च चन्नै दे चबक्खिया जाने आहला- माहनू युक्त एह पैहला मिशन ऐ जेहदे च SLS राकेट नै 4 अंतरिक्ष यात्रियें गी ओरियन कैप्सूल च लेई जाइयै सुरक्षत कक्षा च स्थापत करी दिता। एह प्रक्षेपण भारती समें मताबक अज्ज बड्डलै मूह न्हरे 3 बज्जियै 54 मिंटे पर कीता गेआ।

<><><><><><>

## Football-SAFFS U-20

सैफ अंडर ट्वन्टी फुटबॉल चैम्पियनशिप च मजूदा चैम्पियन भारत नै भूटान गी 5-0 कन्ने रहाइये फाइनल च अपनी थाहर बनाई लैती ऐ। मालद्वीप दे माले च खेड्डे गेदे सैमिफाइनल च भारत दी तरफा Rohen Chaphamayum नै 2 गोल कीते- जिसलै कि Omang Dodunm, महोम्मद अरबाश ते Thokchom Malemnganba नै 1-1 गोल कीता। एहदे शा पैहले बंगलादेश नै नेपाल गी 1-0 कन्ने रहाइये फाइनल च अपनी थाहर पक्की कीती। फाइनल मकाबले च कल भारत ते बंगलादेश बश्कार मकाबला होग।

<><><><><><>

## IPL

IPL च अज्ज कोलकाता दे ईडन गार्डन्स संजा साड्डे 7 बजे कोलकाता नाइट राइडर्स दा मुकाबला सनराईजर्स हैदराबाद कन्ने होग। एहदे शा पैहले कल रातीं लखनऊ दे भारत रत्न श्री अटल बिहारी वाजपेयी एकाना स्टेडियम च होए दे मकाबले च दिल्ली कैपिटल्स नै लखनऊ सुपर जायंट्स गी 6 विकेटें कन्ने रहाई दिता। पैहले बल्लबाजी करदे होई लखनऊ सुपर जायंट्स दी टीम नै 141 रन्ज बनाए- जेहदे च अब्दुल समद नै सब्भनें शा मता 36 रन्ज दा योगदान दिता ऐ। दिल्ली कैपिटल्स दे तेज गेंदबाज लुंगी एनगिडी ते टी. नटराजन नै लखनऊ दे 3-3 खडारी आउट कीते। परते च दिल्ली कैपिटल्स नै समीर रिज़वी दी नबाद 70 रन्ज दी पारी दी बदोलत 17 ओवर ते इक गेंद च 4 विकेटें दे नुक्सान पर लक्ष हासल करी लैता। रिज़वी गी मैन ऑफ द मैच चुनेया गेआ।

<><><><><><>